

## DOMENIE X «VIE PAL AN»

### Antifone di jentrade Sal 26,1-2

**I**l Signôr al è la mê lûs e la mê salvece,  
di cui varaio teme?  
Il Signôr al è chel che al pare la mê vite,  
di cui varaio pôre?  
Ve che si inçopedin e a colin  
i miei nemîs e i miei contraris.

### Colete

Diu, che di te a vegnin dutis lis robis buinis,  
ti prein di dânus l'ispirazion di pensâ ce che al è just  
e la fuarce di metilu in vore.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Gjen 3,9-15

**Jo o metarai in asse la tô gjernazie e la gjernazie de femine.**

Dal libri de Gjenesi

Dopo che Adam al mangjà dal arbul, il Signôr Diu al clamà l'om: «Indulà sêstu?» dissal. I rispuindè l'om: «O ài sintût il to pas tal zardin e o ài vût rivuart parcè che o soi crot e o soi lât a platâmi».

I domandà: «E cui ti aial dit che tu jeris crot? Alore tu âs mangjât di chel arbul che ti vevi inibît di mangjà!». I rispuindè l'om: «E je stade la femine che tu mi âs metude dongje che mi à dât di chel arbul, e jo o ài mangjât!». Il Signôr Diu i disè a la femine: «Parcè po âstu fat chel tant?». E la femine i rispuindè: «Al è stât il madrac che mi à imbroiade, e jo o ài mangjât!».

Alore il Signôr Diu i disè al madrac:

«Par vie che tu âs fat chest,  
tu sarâs maludît fra dut il besteam  
e dutis lis bestiis salvadiis.

Tu ti strissinarâs su la panze  
e tu varâs di passiti di pulvin  
par ducj i dîs de tô vite.

Jo o metarai in asse te e la femine,  
la tô gjernazie e la sô;  
chê ti sfracaiarà il cjâf  
e tu tu cirarâs di muardii il talon».  
Peraule di Diu.

### SALM RESPONSORIÂL dal Salm 129

**R.** Il Signôr al è bon e al perdone.

Signôr, ti berli dal font che mi cjati:

Signôr, scolte la mê vôs;  
che a sedin atentis lis tôs oreli  
a la vôs de mê preiere. **R.**

Se tu tegnis cont, Signôr, de tristerie,  
Signôr, cui rivaraial a parâsi?  
Ma li di te si cjate misericordie  
par che ti rispjetin di plui. **R.**

O speri, Signôr,  
e spere la mê anime; o spieti la sô peraule.  
La mê anime e spiete il Signôr  
plui che no lis vuaitis il cricâ de buinore. **R.**

Israel, spiete il Signôr,  
parcè che cul Signôr si cjate il boncûr  
e grande e je cun lui la redenzie.  
Lui al sfrancjarà Israel di dute la sô tristerie. **R.**

### **SECONDE LETURE 2 Cor 4,13-5,1**

**O crodìn e par chel o fevelìn.**

De seconde letare di san Pauli apuestul ai Corints

Fradis, invoâts di chel spirt di fede che al è scrit: “O ài vude fede, par chel o ài fevelât”, ancje nô o crodìn e par chel o fevelìn, convints che chel che al à risussitât il Signôr Jesù, nus risussitarà ancje nô cun Jesù e nus metarà dongje di lui insiemi cun vualtris. Parcè che si fâs dut par vualtris, par che la gracie, lant parsore, e multiplichi in tancj di lôr la cjante di laude a la glorie di Diu.

Par chel nô no si pierdìn di spirt, ma se ancje il nestri om esteriôr al cole in sfas, il nestri om interiôr si ricree di dî in dî. Parcè che chel tic che o patìn cumò nus procure une cuantitât di glorie spropositade e eterne. Di fat nô no tignìn di voli lis robis che si viodin ma chês che no si viodin. Lis robis che si viodin a durin un lamp; invezit chês che no si viodin a durin par simpri.

Di fat o savìn che cuant che si disfarà la tende di cheste abitazion su la tiere, o cjaparìn di Diu une cjase, abitazion eterne tai cîi, no fate des mans dal om.

Peraule di Diu.

### **CJANT AL VANZELI Zn 15,15**

**R. Aleluia, aleluia.**

Us ài clamâts amîs, al dîs il Signôr,  
parcè che dut ce che o ài sintût di gno Pari  
us al ài fat cognossi.

**R. Aleluia.**

### **VANZELI Mc 3,20-35**

**Satane le à finide.**

Dal vanzeli seont Marc

In chês volte, Jesù cui siei dissepui al torne in cjase e si dà dongje indaûr tante di chês int che no rivavin nancje a tocjâ bocjade. Sintude cheste, i siei a rivarin par brincâlu, parcè che a disevin: «Al va vie di cjâf».

I scrituriscj, vignûts jù di Jerusalem, a disevin invezit: «Al è paronât di Beelzebul», e ancje: «Al pare fûr i demonis midiant dal princip dai demonis». Alore lui ju clamà dongje di se e ur disè in parabolis: «Cemût puedial satane parâ fûr satane? Se un ream al è dividût dentri di se, chel ream nol pò stâ sù. Come ancje se une cjase e je dividude dentri di se, chês cjase no pò stâ sù. Poben, se satane al è jevât sù cuintri di sè e si è dividût, nol pò tignî dûr, anzit le à finide par simpri. Nissun nol pò jentrâ dentri te cjase di un om fuart e quartâi vie la sô robe, se prime nol à peât chel fuart. Dome in chês volte al podarà fiscâ la sô cjase. Us al dîs in veretât che ai fîs dai oms ur saran parâts jù ducj i pecjâts, ancje lis blestemis, par tant che a vedin podût blestemâ. Ma chel che al varà blestemât cuintri dal Spirtu Sant, nol varà remission par in eterni, ma al varà di rispuindi di un pecjât eterni». Di fat lôr a disevin: «Al è paronât di un spirt soç».

Po a rivarin sô mari e i siei fradis che, fermâts difûr, lu mandarin a clamâ. Intant la fole e jere sentade tor di lui. I disin: «Ve, tû mari e i tiei fradis a son chi difûr e ti cirin». Ur rispuint: «Cui ise mê mari e cui sono i miei fradis?». Po, cjalant chei che a jerin sentâts tor ator di lui, al dîs: «Ve mê mari e i miei fradis! Chel che al fâs la volontât di Diu, chel al è gno fradi, mê sùr e mê mari».

Peraule dal Signôr.

**Su lis ufiertis**

Cjale di bon voli, Signôr, il servizi de nestre suditançe  
par che ce che ti ufrin al sedi par te un regâl che ti plasi  
e al fasi cressi il nestri amôr.

Par Crist nestri Signôr.

**Antifone a la comunion Sal 17,3**

Il Signôr al è la mê crete e la mê fuartece:  
al è lui il gno Diu, che mi libere e mi jude.

**O ben: 1 Zn 4,16**

Diu al è amôr; chel che al sta tal amôr  
al reste in Diu e Diu al vîf in lui.

**Daspò de comunion**

La fuarce de tô midisine, Signôr,  
che nus deliberi des nestris tristeriis  
e nus compagni pe strade de justizie.

Par Crist nestri Signôr.